

Den carta na Presidente di Parlamento Fraccion di OLA kier proclamacion oficial di Betico Croes como Libertador di Aruba

ORANJESTAD - Fraccion di partido OLA den Parlamento, esta Glenbert Croes y Dr. Lili Beke-Martinez a manda un carta ayera pa Presidente di Parlamento, Drs. Booshi Wever, cu e peticion pa proclamá oficialmente Betico Croes como Libertador di Aruba.

Segun Croes y Beke-Martinez, despues di a tende e discurso di Promé Minister demisionario n'e ceremonia protocolario pa celebrá nos Dia Nacional di Himno y Bandera; alabes mirando cu for di 1995 interesnan ta surgiendo pa duna e fecha histórico di 18 di Maart un otro enfoque y realce, Glenbert Croes y Dr. Lili Beke-Martinez ta haci uso di art. 24 di Reglamento di Orden di Parlamento pa dirigí nan mes na Presidente di Parlamento, cu e peticion pa pone e siguiente tópiconan como punto di agenda di un reunion público:

1. Preservacion di e historia real di e logro di nos Status Aparte.
2. Proclamacion oficial di G.F. (Betico) Croes como nos Libetador.
3. 18 di Maart mester keda dia di nos Himno y Bandera y alabes nos Dia Nacional.

Segun e firmantenan, na 1973 Betico Croes a tene un manifestacion masal riba 18 di Maart cu e meta pa demostrá n'e Parlamentarionan Hulandes cu tabata di bishita na Aruba, e deseo di pueblo di por obtené su Status Aparte.

Na 1976 Betico Croes a scohe dia 18 di Maart pa inaugurá nos Himno y Bandera cu ta simbolonan di soberanía di nos país Aruba. Ta Betico Croes a duna e fecha 18 di Maart balor y contenido, dunando nos lidernan di pasado nan debido reconocimiento y balor.

Bao di liderazgo di Betico Croes, Aruba durante conferencia



di mesa rondó na Maart 1983 a obtené for di Hulanda su Status Aparte, cu lo a drenta na vigor dia 1 di Januari 1986. E logro di e conferencia di mesa rondó pa nos Status Aparte a worde celebrá en grande na Aruba dia 18 di Maart 1983.

Glenbert Croes y Dr. Lili Beke-Martinez ta spera pronto riba un contesta riba nan peticion.